

## UNSUR PERJUDIAN DALAM PERADUAN

Dewasa ini, banyak pihak yang menganjurkan pelbagai bentuk peraduan dan pertandingan dengan menawarkan hadiah-hadiah yang menarik serta lumayan. Mereka turut mengadakan promosi-promosi peraduan hebat untuk menarik minat masyarakat umum menyertai peraduan tersebut. Kebiasaannya, peraduan-peraduan seperti ini mengkehendaki para peserta untuk membayar sejumlah wang tertentu sama ada dalam bentuk yuran penyertaan, caj khidmat pesanan ringkas (SMS) dan pembelian produk.

Lantaran kebanjiran peraduan-peraduan yang diadakan pada masa kini, satu persoalan timbul iaitu sejauh manakah bentuk-bentuk pertandingan mengikuti lunas-lunas, kehendak syariah dan bebas daripada unsur-unsur yang diharamkan seperti judi? Ini kerana, sebarang pertandingan dan peraduan yang melibatkan unsur pejudian dilarang oleh syarak. Ia adalah bertepatan dengan ayat pengharaman judi:

يَا أَيُّهَا الَّذِينَ آمَنُوا إِنَّمَا الْحُمْرُ وَالْمَيْسِرُ وَالْأَنْصَابُ وَالْأَرْلَامُ رِحْسٌ مِّنْ عَمَلِ الشَّيْطَانِ فَاجْتَبَوْهُ لَعَلَّكُمْ تُفْلِحُونَ

*"Wahai orang-orang yang beriman! Bahawa sesungguhnya arak, judi, pemujaan berhala dan mengundi nasib dengan batang-batang anak panah, adalah (semuanya) kotor (keji) daripada perbuatan syaitan.*

*Oleh itu, hendaklah kamu menjauhinya supaya kamu berjaya."*

*(Surah Al-Maidah:90)*

Berdasarkan ayat di atas, secara jelas perbuatan berjudi adalah satu amalan yang keji dan berdosa di sisi Islam. Namun, melihatkan kepada situasi semasa iaitu kurangnya kesedaran masyarakat tentang bahaya terlibat dengan unsur-unsur perjudian menyebabkan ramai individu terjerumus untuk menyertai skim dan peraduan yang diragui statusnya dari sudut pandang syariah.

Justeru, bagi mengelakkan masyarakat daripada terjebak dengan peraduan yang berunsur perjudian, adalah penting untuk menjelaskan beberapa unsur yang melibatkan perjudian. Antara unsur-unsur tersebut ialah melibatkan eksplotasi, kesamaran, pertaruhan dan nasib.

Unsur-unsur perjudian ini juga ada disebut dalam Muzakarah Jawatankuasa Fatwa Majlis Kebangsaan bagi Hal Ehwal Ugama Islam Malaysia kali ke-64 yang bersidang pada 27 Julai 2004 dengan pihak jawatankuasa telah memutuskan bahawa:

*"Peraduan kuiz melalui SMS dan seumpamanya adalah mengandungi unsur-unsur eksplotasi, kesamaran (tidak jelas), pertaruhan dan nasib yang tergolong dalam pengertian judi. Ekoran itu, hukum peraduan kuiz tersebut adalah haram di sisi syarak."*

Antara bentuk eksplotasi yang sering berlaku dalam peraduan adalah apabila pihak penganjur secara giat mempromosikan hadiah lumayan yang ditawarkan dengan tujuan mempengaruhi kumpulan sasaran. Dalam masa yang sama, pihak penganjur mengambil kesempatan dengan mengenakan pelbagai caj kepada golongan yang ghairah ingin memenangi tawaran hadiah tersebut walaupun mereka terpaksa mengeluarkan kos bagi menyertainya. Bentuk eksplotasi sebegini adalah ditegah dalam Islam.

## Promosi Produk

Bagaimanapun, Akademi Fikah Antarabangsa, Pertubuhan Islam Antarabangsa (OIC) dalam resolusinya ke-127 (1/14) ketika persidangan kali ke-14 di Doha telah memutuskan bahawa tidak ada larangan jika pihak pengajur ingin mempromosikan produk mereka dengan cara menganjurkan pertandingan yang diharuskan. Namun, pertandingan dengan tujuan tersebut hendaklah tidak melibatkan sebarang elemen penipuan maupun pengkhianatan kepada para pelanggan.

Selain itu, pertaruhan yang diharamkan juga boleh berlaku dalam peraduan. Pertaruhan adalah perbuatan meletakkan sejumlah wang atau ganjaran lain untuk dijadikan rebutan antara dua pihak atau lebih yang mengakibatkan sebelah pihak sahaja yang untung manakala pihak yang lain menanggung kerugian. Disebutkan dalam kitab al-Mughni oleh Ibnu Qudamah, jika hadiah pertandingan itu datang daripada wang peserta sama ada dalam bentuk yuran dan sebagainya, maka hal itu adalah haram kerana ia tergolong dalam perjudian nasib (qimar).

Hal ini berikutan sesetengah peserta pertandingan tidak dapat lari sama ada akan meraih untung atau menanggung rugi. Ia telah dijelaskan oleh Akademi Fikah Antarabangsa OIC dalam resolusinya bahawa sebarang bentuk pertandingan yang melibatkan pembelian kupon ataupun token yang mana keseluruhan atau sebahagian bayarannya digunakan untuk tujuan penyediaan hadiah, maka ia adalah tidak dibenarkan dalam syariah kerana hal tersebut termasuk dalam salah satu bentuk perjudian.

Begitu juga dengan semua bentuk pertaruhan yang meletakkan nasib kemenangan bergantung kepada nasib semata-mata seperti cabutan tiket loteri. Ini juga sama dalam peraduan cabutan bertuah yang menuntut peserta membayar sejumlah yuran atau menghantar SMS bagi menyertainya sedangkan hadiah hanya akan diperoleh peserta tertentu hanyalah berdasarkan nasib. Namun, berbeza keadaannya jika cabutan tersebut boleh disertai tanpa memerlukan bayaran tambahan daripada peserta.

Sebagai contoh, sebuah syarikat menetapkan bahawa pembeli secara automatik layak menyertai cabutan bertuah kendalian syarikat itu. Antara isu lain yang berkaitan dengan unsur perjudian ialah pengajur sesebuah peraduan menetapkan syarat-syarat yang kurang jelas dan mengelirukan. Dalam sesetengah keadaan, syarat yang ditetapkan sering memberi keuntungan kepada pihak pengajur dengan melepaskan mereka daripada liabiliti jika berlaku sebarang masalah sepanjang peraduan dan dalam masa sama, wang yang diberikan oleh peserta tidak akan dikembalikan.

Selain itu, terdapat banyak peraduan melalui SMS yang mengenakan pelbagai caj jika peserta mahu menyertainya dengan caj-caj ini tidak dinyatakan secara jelas. Kebiasaannya caj ini adalah beberapa kali ganda lebih tinggi berbanding caj SMS biasa. Syubhab atau kesamaran seperti ini perlu dijauhi bagi mengelakkan seseorang individu terjebak kepada perjudian tanpa disedari.

## Pembaziran

Sesungguhnya, perbuatan berjudi atau menyertai mana-mana peraduan berunsur judi adalah suatu kerja yang sia-sia dan termasuk dalam pembaziran yang ditegah dalam Islam. Hal ini kerana, wang yang dibelanjakan tidak menjamin apa-apa pulangan melainkan kerugian, manakala jika ada keuntungan pula hanya bergantung kepada nasib. Sebagaimana firman Allah SWT:

إِنَّ الْمُبَدِّرِينَ كَانُوا إِحْوَانَ الشَّيَاطِينِ ۖ وَكَانَ الشَّيْطَانُ لِرَبِّهِ كُفُورًا

"Sesungguhnya orang yang membazir itu adalah saudara syaitan sedangkan syaitan adalah makhluk yang sangat kufur kepada tuhannya." (Surah Al-Isra':27)

Perjudian juga secara jelas termasuk dalam kategori memakan harta orang lain secara salah serta membawa kepada permusuhan dan pertengkaran. Dalam hal ini, masyarakat awam hendaklah tidak terlalu mengambil mudah isu ini agar tidak terjebak dan terlibat dengan bentuk-bentuk perjudian semasa. Justeru, adalah digalakkan agar kita sentiasa cermat dalam memilih peraduan tertentu bagi memastikan ia tidak terlibat dengan unsur-unsur perjudian yang dilarang syarak.